

四庫全書

集部

欽定四庫全書

集部

花草粹編卷七

詳校官編修臣周瓊

侍讀臣孫球覆勘

總校官檢討臣何思鈞

校對官中書臣湯坦

謄錄監生臣萬朝宗

欽定四庫全書

花草粹編卷七

明 陳耀文 撰

小令

憶秦娥

一名秦樓月
一名雙荷葉

李太白

簫聲咽秦娥夢斷秦樓月秦樓月年年柳色灞陵傷別
樂遊原上清秋節咸陽古道音塵絕音塵絕西風殘

照漢家陵闕

佳人

周美成

香馥馥樽前有個人如玉人如玉翠翹金鳳內家粧束
嬌羞愛把眉兒蹙逢人只唱相思曲相思曲一聲聲
是怨紅愁綠

二

雙溪月清光偏照雙荷葉雙荷葉紅心未偶綠衣偷結
背風迎雨淚珠滑輕舟短棹先秋折先秋折煙鬟未
上玉杯微缺

陳去非

魚龍舞湘君欲下瀟湘浦
瀟湘浦興亡離合亂波平楚
獨無樽酒醉端午移舟來
聽明山雨明山雨白頭孤
客洞庭懷古

程正伯

青門深海棠開盡春陰陰
春陰陰萬重雲水一寸歸心
玉樓深鎖烟消沉知他何日
同登臨同登臨待收紅
淚細說如今

二

愁無語黃花庭院黃梅雨黃梅雨新愁一寸舊愁千縷
杜鵑叫斷空山苦相思欲寄人何許人何許一重雲
斷一重山阻

春思

康伯可

春寂寞長安古道東風惡東風惡胭脂滿地杏花零落
臂銷不奈黃金鐲天寒尚怯春衫薄春衫薄不禁搵
淚為君彈却

房舜卿

與君別相思一夜梅花發
梅花發淒涼南浦斷橋斜月
盈盈微步凌波襪東風笑倚
天涯濶天涯濶一聲羌管暮
雲愁絕

曾純甫

西風節碧雲捲盡秋宵月
秋宵月關河千里照人離別
樽前俱是天涯客那堪三載
遙相憶遙相憶年光依舊
漸成華髮

邯鄲道望叢臺有感

前人

風蕭瑟邯鄲古道傷行客
傷行客繁華一瞬不堪思憶
叢臺舞歌無消息金樽玉管空
塵跡空塵跡連天草
樹暮雲凝碧

范至能

湘江碧故人同作湘中客
湘中客東風空鴈杏花寒食
温温月到藍橋側醒心絃裏春
無極春無極明朝殘
夢馬嘶南陌

向伯恭

芳菲歇故園目斷傷心切傷心切無邊烟水無窮山色
可惜更近乾龍節眼中淚盡空啼血空啼血子規聲
外曉風殘月

二

蟲聲切柔腸欲斷傷離別傷離別幾行清淚界殘紅頰
玉階白露侵紅襪下簾却望玲瓏月玲瓏月寒光零
亂照人愁絕

周紫芝

東風歌香塵滿院花如雪花如雪看看又是黃昏時節
無言獨自添香鴨相思情絮無人說無人說照人只
有西樓斜月

二

暮雲碧佳人不見愁如織愁如織兩行征鴈數聲羌笛
錦書難寄西飛翼無言只是空相憶空相憶紗窻人
夢夢雙人隻

三

嬌滴滴雙眉斂破春山色
春山色為君含笑為君愁
感多情別後無消息
此時更有誰知得
誰知得夜深無寐
度江橫笛

四

臨高閣亂山平野烟光薄
烟光薄棲鴉歸後暮天吹角
斷香殘酒襟懷惡
西風吹起梧桐落
梧桐落又還愁也
又還寂寞

別情

万俟雅言

千里草萋萋盡處遙山小
遙山小行人遠似此山多少
天若有情天亦老此情說
便說不了說不了一聲喚
起又驚春曉

碧雲深

張輯

風淒淒井欄絡緯驚秋啼
驚秋啼涼侵好夢月正樓西
卷簾望月知心誰關河空
隔長相思長相思碧雲暮
合有美人兮

賀方回

曉矇矇前溪百鳥啼
匆匆啼匆匆凌波人去拜月樓空
舊年今日東門東
鮮粧輝映桃花紅
桃花紅吹開吹
落一任東風

懷人

朱雍

風蕭蕭驛亭春信期
春潮期春潮黃昏浮動誰在江皋
碧雲冉冉橫溪橋
瓊車未至餘香飄
餘香飄一簾踈
影月在花梢

蓬萊閣

秦樓月

宋人

齊乘

烟漠漠水天搖蕩蓬萊閣蓬萊閣朱甍碧瓦半浸寥廓
三山設有長生藥茫茫雲海風濤惡風濤惡仙槎不
見暮沙潮落

詩餘

秋寂寂碧紗窻外人橫笛人橫笛天津橋上舊曾聽得
宮粧玉指無人識龍吟水底聲初息聲初息月明江
上數峯凝碧

詩餘

雲垂幕陰風慘淡
天花落天花落
千林瓊玖滿空鸞鶴
征車渺渺穿華薄
路迢迢倍增離索
增離索楚溪山水
碧湘樓閣

秋宵

黃叔暘

心如結西風老盡
黃花節黃花節塞
鴻聲斷冷烟淒月
漢朝陵廟唐宮闕
興衰萬變從誰說
從誰說千年青史
幾人華髮

初春

楊萬里

新春早春前十日春歸了春歸了落梅如雪野桃紅小
老夫不管春催老只圖爛醉花前倒花前倒兒扶歸
去醒來窻曉

閨情

孫夫人 鄭文妻

花深深一鈎羅襪行花陰行花陰閒將柳帶試結同心
耳邊消息空沉沉畫眉樓上愁登臨愁登臨海棠開
後望到如今

正月六日夜月

朱淑真

彎彎曲新年新月鈎寒玉鈎寒玉鳳鞋兒小翠眉兒蹙
鬧蛾雪柳添妝束燭籠火樹爭馳逐爭馳逐元宵三
五不如初六

更漏子

温廷筠

柳絲長春雨細花外漏聲迢遞驚塞鴈起城烏畫屏金
鷓鴣香霧薄透簾幕惆悵謝家池閣紅燭背綉簾垂
夢長君不知

二

星斗稀鐘鼓歇簾外曉鶯殘月蘭露重柳風斜滿庭堆
落花 虛閣上倚欄望還似去年惆悵春欲暮思無窮
舊歡如夢中

三

金雀釵紅粉面花裏暫時相見知我意感君憐此情須
問天 香作穗蠟成淚還似兩人心意山枕膩錦衾寒
覺來更漏殘

四

相見稀相憶久眉淺澹煙如柳垂翠幕結同心待郎燠
綉衾城上月白如雪蟬鬢美人愁絕宮樹暗鵲橋橫
玉籤初報明

五

背江樓臨海月城上角聲嗚咽堤柳動島煙昏兩行征
鴈分京口路歸帆渡正是芳菲欲度銀燭盡玉繩低
一聲村落鷄

六

玉鑪煙紅蠟淚偏對畫堂秋思眉翠薄鬢賞雲殘夜長余
枕寒 梧桐樹三更雨不道離情正苦一葉葉一聲聲
空塔滴到明

韋莊

鐘鼓寒樓閣暝月照古桐金井深院閉小庭空落花香
露紅 煙柳重春霧薄燈背水窗高閣閒倚戶暗沾衣
待郎郎不歸

牛嶠

星漸稀漏頻轉何處輪臺聲怨香閣掩杏花紅月明楊
柳風挑錦字記情事唯願兩心相似收淚語背燈眠
玉釵橫枕邊

二

春夜闌更漏促金爐暗挑殘燭驚夢斷錦屏深兩鄉明
月心 閨草碧望歸客還是不知消息辜負我悔憐君
告天天不聞

三

南浦情紅粉淚爭奈兩人深意低翠黛卷征衣馬嘶霜
葉飛 招手別寸腸結還是去年時節書託鴈夢歸家
覺來江月斜

毛文錫

春夜闌春恨切花外子規啼月人不見夢難憑紅紗一
點燈 偏怨別是芳節庭下丁香千結宵霧散曉霞輝
梁間雙燕飛

顧瓊

舊歡娛新悵望擁鼻含嚔樓上濃柳翠晚霞微江鷗接
翼飛簾半捲屏斜掩遠岫參差迷眼歌滿耳酒盈罇
前非不要論

孫光憲

聽寒更聞遠鴈半夜蕭娘深院扃綉戶下珠簾滿庭噴
玉蟾人語靜香閨冷紅幕半垂清影雲雨態蕙蘭心
此情江海深

二

今夜期來日別相對祗堪愁絕
恨粉面拋揉簪無言淚
滿襟 銀箭落霜華薄墻外曉
雞咿啞聽付囑惡情悰
斷腸西復東

毛熙震

秋色清河影澹深戶燭寒光
暗綃幌碧錦衾紅博山香
炷融 更漏咽蛩鳴切滿院
霜華如雪新月上薄雲收
映簾懸玉鈎

二

煙月寒秋夜靜漏轉金壺初永羅幕下繡屏空燈花結
碎紅 人悄悄愁無了思夢不成難曉長憶得與卽期
竊香私語時

三

金剪刀青絲髮香墨蠻牋親札和粉淚一時封此情千
萬重 蓬垂鬢塵青鏡已分今生薄命將遠恨上高樓
寒江天外流

四

秋水平黃葉晚落日渡頭雲散擡朱箔掛金鈎暮潮人
倚樓歡娛地思前事歌罷不勝沉醉消息遠夢魂狂
酒醒空斷腸

五

風帶寒秋正好蘭蕙無端先老雲杳杳樹依依離人殊
未歸 寒羅幕凭朱閣不獨堪悲搖落月東出鴈南飛

誰家夜擣衣

歐集
亦有

六

鴈孤飛人獨坐看却一秋空過
瑤草短菊花殘蕭條漸
向寒 簾幙裡青苔地誰信閒愁如醉星移後月圓時
風搖夜合枝

七

夜初長人近別夢斷一窻殘月
鸚鵡睡蟋蟀鳴西風寒
未成 紅蠟燭伴碁局床上畫屏山
綠褰綉幌倚瑤琴
前歡淚滿襟

晏同叔

薜華濃山翠淺一寸秋波如剪紅日永綺筵開暗隨仙
馭來 過雲聲回雪袖占斷曉鶯春柳纔送日又顰眉
此情誰得知

二

雪藏梅烟着柳依約上春時候初送鴈欲聞鶯綠池波
浪生 探花開留客醉憶得去年情味金盞酒玉爐香
任他紅日長

小山詞

檻花稀池草遍冷落吹笙庭院人去日燕西飛燕歸人
未歸 數書期尋夢意彈指一年春事新悵望舊悲涼
不堪紅日長

二

柳絲長桃葉小深院斷無人到紅日淡綠烟晴流鶯三
兩聲 雪香濃檀暈少枕上卧枝花好春思重曉粧遲
尋思殘夢時

三

露華高風信遠宿醉盡簾低卷梳洗倦冶遊慵綠窓春
睡濃 綵條輕金縷重昨日小橋相送芳草恨落花愁
去年同倚樓

四

柳間眠花裏醉不惜綉裙鋪地釵燕重鬢蟬輕一雙梅
子青 粉牋書羅袖淚還有可憐新意遮悶綠掩羞紅
晚來團扇風

張子野

杜陵春秦樹晚傷別更堪臨遠南去信欲憑誰歸鴻多
北歸 小桃枝紅蓓發今夜昔時風月休苦意說相思
少情人不知

杜壽域

臉如花花不笑雙臉勝花能笑肌似玉玉非溫肌溫勝
玉溫 既相逢情不重何似當初休共情既重却分飛
爭如不見伊

向子諲

鵲橋邊牛渚上翠節紅旌相向承玉露挹金風年年歲
歲同懶飛梭停弄杼遙想彩雲深處人咫尺事關山
無聊獨倚欄

二

雪中韓叔
夏席上

小窻前踈影下鸞鏡弄粧初罷梅似雪雪如人都無一
點塵暮江寒人響絕更著朦朧微月山似玉玉如君
相看一笑溫

三

題趙伯山清白軒
時王豐父同賦

竹孤青梅皦白更著使君清絕梅似竹竹如君須知德
有隣 月同高風同調月底風前一笑翻碎影度浮香
與人風味長

蒲江

蓼花繁桐葉下寂寂夢回涼夜城角斷砌蛩悲月高風
起時 衣上淚誰堪寄一寸妾心千里人北去鴈南征
滿庭秋草生

天機

解語花斷腸草諳盡風流煩惱歡會少別離多此情無
奈何 帳前燈窻間月記得那時節綉被剩畫屏空如
今在夢中

梅苑

絳紗籠金葉蓋向戲燈花猶在水未結小瑠璃壠梅香
滿枝 雪無香花有意不是江南新寄霜月淨碧天寒
玉樓人倚闌

寄季玉妹

延安夫人

小闌干深院宇依舊當時別處朱戶鎖玉樓空一簾霜
日紅弄珠江何處是望斷碧雲無際凝淚眼出重城
隔溪羌笛聲

喜遷鶯

人洶洶鼓鼙襲襟袖五更風大羅天上月朦朧騎馬上
虛空香滿衣雲滿路鸞鳳遶身飛舞霓旌絳節一羣
羣引見玉華君

二

街鼓動禁城開天上探人迴鳳銜金榜出雲來平地一聲雷鶯已遷龍已化一夜滿城車馬家家樓上簇神仙爭看鶴冲天

薛昭蘊

金門曉玉京春駿馬驟輕塵樺煙深處白衫新認得化龍身九陌喧千戶啓滿袖桂香風細杏園歡宴曲江濱自此占芳辰

三

清明節雨晴天得意正當年馬驕泥軟錦連乾香袖半
籠鞭花色融人竟賞盡是綉鞍朱鞅日斜無計更留
連歸路草和煙

毛文錫

芳春景暖晴煙喬木見鶯遷傳枝隈葉語關關飛過綺
叢間錦翼鮮金毳軟百轉千嬌相喚碧紗窓曉怕聞
聲驚破鴛鴦暖

李後主

曉月墜宿雲微無語枕憑歌夢回芳草思依依天遠鴈
聲稀啼鶯散餘花亂寂寞畫堂深院片紅休掃儘從
伊留待舞人歸

馮延巳

本作
和凝

曉月墜宿雲披銀燭錦屏帷建章鍾動玉繩低宮漏出
花遲春態淺來雙燕紅日初長一線嚴粧欲罷轉黃

鸝飛上萬年枝

見南
唐書

二

宿鶯啼鄉夢斷春樹曉朦朧殘燈和燼閉朱櫳人語隔
屏風香已寒燈已絕忽憶去年離別石城花雨倚江
樓波上木蘭舟

鶴冲天

夏英公

青箱
雜記

霞散綺月沉鈎簾捲未央樓夜深河漢接天流宮殿鎖
新秋 瑤堦曙金莖露鳳隨香和雲霧三千珠翠擁宸
遊水殿按梁州

歐陽永叔

梅謝粉柳拖金香滿舊園林
養花天氣半晴陰
花好却愁深
花無數愁無數
花好却愁春去戴花持酒祝東風
千萬莫匆匆

二

花不盡柳無窮
應與我情同
觥船一棹百分空
何處不相逢
朱絃悄知音
少天若有情應老勸君看取利名場
今古夢茫茫

春光好

即喜
遷鶯

馮延巳

露濛濛風淅淅楊柳帶疎烟飄飄輕絮滿南園墻下草
芊絲燕初飛鶯已老拂面春風長好相逢携酒且高
歌人生得幾何

阮郎歸

一名醉桃
源碧桃春

李後主

東風吹水月銜山春來長是閒落花狼籍酒闌珊笙歌
醉夢間珮聲悄晚粧殘憑誰整翠鬟留連光景惜朱

顏黃昏獨倚闌

後有隸書東
官書府印

二

南園春半踏青時
風和聞馬嘶
青梅如豆柳如眉
日長蝴蝶飛
花露重草烟低
人家簾幙垂
秋千慵困解羅衣
盡梁雙燕歸

三

角聲吹斷隴梅枝
孤窓月影低
塞鴻無限欲驚飛
城烏休夜啼
尋斷夢掩香閨
行人去路迷
門前楊柳綠陰齊
何時聞馬嘶

歐陽永叔

雪霜林際見依稀
清香已暗期
前村已遍倚
南枝羣花猶未知
情似舊賞休
遲看看壠上吹
便從今日賞芳菲
韶華取次歸

晏叔原

來時紅日弄窻紗
春紅入睡霞
去時庭樹欲棲鴉
香屏掩月斜
收翠羽
整粧華
青驪信又差
玉笙猶戀碧桃花
今宵未憶家

二

舊香殘粉似當初，人情恨不如。一春猶有數行書，秋來書更踈。衾鳳冷，枕鸞孤，愁腸待酒舒。夢魂縱有也成虛，那堪和夢無。

司馬光

青箱雜記

漁舟容易入深山，仙家日日閒。綺窓紗幌映朱顏，相逢醉夢間。松露冷，海霞殷，匆匆整棹還。落花寂寂水潺潺，潺重尋此路難。

張子野

仙郎何日是來期無心雲勝伊行雲猶解傍山飛郎行
去不歸 強自畫又芳菲春深輕薄衣桃花無語伴相
思陰陰月上時

二

落花浮水樹臨池年前心眼期見來無事去還思而今
花又飛 淺螺黛淡胭脂閒粧取次宜隔簾風雨閉門
時此情江月知

東坡

綠槐高柳咽新蟬
薰風初入絃
碧紗窓下水沉煙
棋聲驚晝眠
踈雨過小荷
翻榴花開欲燃
玉盆纖手弄清

泉瓊珠碎却圓

古今詞話云觀者歎服其入句狀八景音律一同殊不散亂人爭寶之刻之琬琰掛于堂室間也

茶

黃山谷

歌停檀板舞停鸞
高陽飲興闌
獸煙噴盡玉壺乾
香分小鳳團
雲浪淺露珠圓
捧甌春筍寒絳紗
籠下躍金

鞍歸時人倚闌

詩餘舊本以前詞話東坡狀八景入此下諸刻因之誤

效福唐獨木橋體作茶詞

前人

烹茶留客駐雕鞍有人愁遠山別郎容易見郎難月斜
窓外山歸去後憶前懽畫屏金博山一盃春露莫留
殘與郎扶玉山

三

退紅衫子亂蜂兒衣寬只為伊為伊去得忒多時教人
直是疑長睡晚理粧遲愁多懶畫眉夜來笑得有歸

期燈花則甚知

秦少游

碧天如水月如眉
城頭銀漏遲
綠波風動畫船移
嬌羞初見時
銀燭暗翠簾垂
芳心兩自知
楚臺魂斷曉雲飛
幽歡難再期

二

褪花新綠漸團枝
撲人風絮飛
秋千未拆水平堤
落紅成地衣
遊蝶困亂鶯啼
怨春春怎知
日長早被酒禁

持那堪更別離

三

宮腰裊裊翠鬟鬆
夜堂深處逢無端
銀燭殞秋風
靈犀得暗通
更有恨恨無窮
星河沉曉空
隴頭流水各西東
佳期如夢中

四

瀟湘門外水平鋪
月寒征棹孤
紅妝飲罷少踟躕
有人偷向隅
揮玉筋洒真珠
梨花春雨餘
傍人盡道斷腸

初那堪腸也無

五

湘天風雨破寒初
深沉庭院虛
麗譙吹罷小單于
迢迢清夜徂
鄉夢斷
旅魂孤
崢嶸歲又除
衡陽猶有鴈傳書
柳陽和鴈無

周美成

冬衣初染遠山青
雙絲雲鴈綾
夜寒袖濕欲成冰
都緣珠淚零
情黯黯
悶騰騰
身如秋後蠅
若教隨馬逐郎

行不辭多少程

二

萵蒲華老水平沙臨流蘇小家畫闌曲徑宛秋蛇金英
垂露華 燒蜜炬引蓮娃酒香蒸臉霞再來重約日西
斜倚門聽暮鴉

蘇養直

西園風暝落花時綠陰鶯亂啼倚欄無語惜芳菲絮飛
蝴蝶飛 綠底事減腰圍遣愁愁著眉波連春渚暮天

垂燕歸人未歸

乙卯鄱陽道中作

向伯恭

江南江北雪漫漫
遙思易水寒
同雲深處是三關
斷腸山又山
天可老
海能翻
消除此恨難
頻聞遣使問
平安
幾時鑿輅還

趙子發

馬蹄踏月響空山
梅生煙壑寒
水妃去後淚痕乾
天風吹珮蘭
紉香久
怕花殘
與君聊據鞍
一枝欲寄北人

看如今行路難

曹元寵

簷頭風佩響丁東
簾踈燭影紅鞦韆人散月溶溶
樓臺花氣中
春酒醒夜寒濃
綉衾誰與同
只愁夢短不相逢
覺來羅帳空

蔣元龍

山池芳草綠初勻
柳寒眉尚顰
東風吹雨細於塵
一庭花臉皺
鶯共蝶怨還嗔
眼前無好春
這般天氣殺愁

人人愁旋旋新

西湖摘楊梅作

周紫芝

西湖山下水潺潺滿山風雨寒枝頭紅日曉爛斑越梅
催曉丹連翠葉擁金盤玉池生亂泉此生三度試甘
酸欲歸歸尚難

蘆川詞

長楊風軟弄腰肢日長蝴蝶飛雨餘新綠細通池玉鈎
懸妓衣鴻鴈遠子規啼此情誰得知一尊聊與故人

持醉來悲別離

劉叔安

寒陰漠漠夜來霜
階庭楓葉黃
歸鴉數點帶斜陽
誰家砧杵忙
燈弄幌
月侵廊
薰籠添寶香
小屏低枕怯更長
和雲入醉鄉

德壽宮看花凭欄有燕掠水

應制

曾覲

柳陰庭院占風光
呢喃春晝長
碧波新漲小池塘
雙雙蹴水忙
萍散漫絮飄揚
輕盈體態狂
為憐流水落花

香銜將歸盡梁

史邦卿

龍香吹袖白藤鞭帽簷衝柳烟一春幾度盡橋邊東風
聽管絃花活計酒因緣從人嘲少年直須吟就綠楊
篇灣頭寄小憐

月下感事

舊時明月舊時身舊時梅花新舊時月底似梅人梅春
人不春香入夢粉成塵情多多斷魂芙蓉孔雀夜溫

溫愁痕即淚痕

陳康伯

閒來溪上有雲飛
溪光接翠微
江南三月落花時
春波去櫂遲
尋竹路破林扉
蒼臺舊釣磯
欲歸回首未成歸
黃塵滿素衣

春閨

詩餘

春風吹雨遠殘枝
落花無可飛
小池寒綠欲生漪
雨晴還日西
簾半捲燕雙歸
諱愁無奈眉
翻身整頓著殘

棋沉吟應劫遲

徐淵子

茶寮山上一頭陀新來學者磨蝨蟬螬與烏螺知他
放幾多有一物似蜂窩姓牙名老婆雖然無奈得它
何如何放得它

徐淵子舍人好以詩文諧謔丁少詹與妻有違言乃
弃家居茶寮山茹素誦經日買海物放生久而不歸
妻患之祈徐譬解徐許諾出門見賣老婆牙
買一巨筐餉丁且作此詞丁見詞大笑而歸

天機

帝城西下望西山，城居歲又殘。
萬家風雪一家寒，青燈語夜闌。
人鮓甕鬼門關，無窮人往還。
求官莫要近長安，長安行路難。

王從叔

風中柳絮水中萍，聚散兩無情。
斜陽路上短長亭，今朝第幾程。
何限事可憐生，能消幾度春。
別時言語總傷心，何曾一字真。

春景

嚴次山

拍堤春水蘸垂楊
水流花片香
弄花噴柳小鴛鴦
一雙隨一雙
簾半捲露新粧
春衫是柳黃
倚欄看處背斜陽
風流暗斷腸

黃叔暘

粉香吹暖透單衣
金泥雙鳳飛
閒來花下立多時
春風酒醒遲
桃葉曲柳枝
詞芳心空自知
湘臯月冷佩聲微
鴈歸人不歸

碧桃春

丁持正
翰

幾年辛苦搥元霜一朝瓊粉香雲英縹渺曳仙裳相將
騎鳳凰 鈞帝樂酌天漿千年顏色芳從茲歸去白雲
鄉碧桃春晝長

白玉蟾

淡煙凝翠鎖寒蕪斜陽掛碧梧沙頭三兩鴈相呼瀟瀟
風捲蘆 何處笛一聲孤岸邊人釣魚快航一夜泊桐
廬問人沽酒無

魏夫人

夕陽樓外落花飛，晴空碧四垂。去帆回首已天涯，孤烟捲翠微。樓上客，鬢成絲。歸期未有期，斷魂不忍下危梯。桐陰月影移。

攤破浣溪沙

毛文錫

春水輕波浸綠苔，枇杷洲上紫檀開。晴日眠沙鷗鵝穩，暖相隈。羅襪生塵游女過，有人逢著弄珠迴。蘭麝飄香初解珮，忘歸來。

山花子

和凝

鶯錦蟬殼馥麝臍輕裾花草曉煙迷
鴻鵠顫金紅掌墜
翠雲低 星靨笑隈霞臉畔感金開
檐襯銀泥春思半
和芳草嫩綠萋萋

二

銀字笙寒調正長冰紋簾冷畫屏涼
玉腕重金扼臂澹
梳粧 幾度試香纖手暖一迴嘗
酒絳脣光伴弄紅絲
蠅拂子打檀郎

顧璣

紅藕香寒翠渚平
月籠虛閣夜蛩清
天際橫枕上夢兩
牽情 寶帳玉爐殘
麝冷羅衣金縷暗
塵生小窻深孤
燭背淚縱橫

賀方回

湖上秋深藕葉黃
清霜銷瘦損垂楊
洲背嫩沙斜照暖
睡鴛鴦 紅粉蓮娃
何處在西風不為
管餘香今夜月
明聞水調斷人腸

簡傅嵒叟

辛幼安

揔把平生入醉鄉大都三萬六千觴今古悠悠多少事
莫思量微有些寒春雨好更無尋處野花香年去年
來還又笑燕飛忙

梅苑

雪態冰姿好侶伊料應嘗笑水僊遲驛使初傳芳信早
賞佳期暗想花神多巧妙粘酥綴玉壓纖枝粉面臨
鸞宜月殿整粧時

彈箏

賀方回

錦鸚朱紵瑟瑟徽玉纖新擬鳳雙飛縹緲燭煙花暮暗
就更衣 約畧整環釵影動遲回顧步珮聲微宛是春
風蝴蝶舞帶香歸

湯詞

周紫芝

門下青驄月下嘶映堦籠燭盡簾垂一曲陽關聲欲盡
不多時 鳳餅未殘雲脚亂水沉催注玉花莖忍看捧
甌春筍露翠鬟垂

劉金壇

標致清高不染塵
星冠雲鬢紫霞裙
門掩斜陽無一事
撫瑤琴
鶴觀幽花偏惹恨
竹窻閒月最銷魂
此際得教還俗去謝天尊

李易安

揉破黃金萬點輕
剪成碧玉葉層層
風度精神如彥輔
大鮮明
梅蘂重重何俗甚
丁香千結苦麝生
熏透愁人千里夢
却無情

二

病起蕭蕭兩鬢華，卧看殘月上窓紗。
豆蔻連梢剪熟水，莫分茶。
枕上詩書閒處好，門前風景雨來佳。
終日向人多蘊藉，木犀花。

聖無憂

歐陽永叔

世路風波險，十年一別須臾。
人生聚散長如此，相見且歡娛。
好酒能消光景，春風不染鬢鬚。
為公一醉花前，倒紅袖莫來扶。

相思令

晏同叔

昨日探春消息湖上綠波平無奈繞堤芳草還向舊痕
生有酒且醉瑤觥更何妨檀板新聲誰教楊柳千絲
就中牽繫人情

早梅芳近

李德載

深院靜小欄傍標致不尋常儘他桃李占風光誰敢闖
新粧玉堂中梁苑裏休把雪來輕比莫吹長笛巧催
殘留取月中看

二

殘臘裏早梅芳春信報新陽曉來枝上抱寒光輕點壽
陽粧雪難欺霜莫妬別是一般風措望林人意正妖
嬈漸看長新條

燕歸來

晏叔原

蓮葉雨蓼花風秋恨幾枝紅遠烟收盡水溶溶飛鴈碧
雲中衷腸事魚牋字情緒年年相似凭高雙袖晚寒
濃人在月橋東

望仙樓

晏叔原

小春花信日邊來未上江梅先折今歲東君消息還自
南枝得素衣染盡天香玉酒添成國色一自故溪踈
隔腸斷長相憶

甘草子

早春宴客

寇萊公

湘山野錄

春早柳絲無力低拂青門道暖日籠啼鳥初折桃花小
遙望碧天淨如掃曳一縷輕寒縹渺堪惜流年謝芳
草任玉壺傾倒

秋深

柳耆卿

秋暮亂洒衰荷顆顆真珠雨雨過月華生冷徹鴛鴦浦
池上凭欄愁無侶奈此箇單棲情緒却傍金籠共鸚
鵡念粉郎言語

二

秋盡葉剪紅綃砌菊遺金粉鴈字一行來還有邊庭信
飄散露華清風緊動翠幙曉寒猶嫩中酒殘牋慵整
頓聚兩眉離恨

楊無咎

秋暮永夜西樓冷月明
窓戶夢破櫓聲中憶在松江路
歌枕試尋曾遊處記歷歷風光堪數誰與浮家五湖
去儘醉眠秋雨

畫堂春

春怨

秦少游

山谷集有

東風吹柳日初長
雨餘芳草斜陽杏花零落燕泥香
睡損紅粧寶篆煙消鸞鳳畫屏雲鎖
瀟湘暮寒微透薄羅裳無限思量

春怨

徐師川

少游集有

欽定四庫全書

花草粹編

五

落紅鋪徑水平池弄晴小雨霏霏杏花憔悴杜鵑啼無
奈春歸 柳外畫樓獨上凭欄手撚花枝放花無語對
斜暉此恨誰知

趙元鎮

空籠簾影隔垂楊夢回芳草池塘杏花枝上蝶雙雙春
晝初長 強理雲鬟臨照暗彈粉淚沾裳自憐容艷惜
流光無限思量

石次仲

寒蛩切切響空帷
斷腸風葉霜枝鳳樓何處鴈書遲空
數歸期
漸覺沈腰春瘦却成宋玉秋悲又還辜負菊
花時沒箇人知

春思

鄭中卿

東風吹雨破花慳
客毡曉夢生寒有人斜倚小屏山
感損眉彎
合是一釵雙燕却成兩鏡孤鸞
暮雲修竹淚留殘翠袖凝班

蒲江

玉屏回夢月平欄
元來香冷衣單
柳風特地更將寒吹
上眉端
雲羽未回征鴈鏡
花空舞雙鸞
去年芳徑又
爛斑門掩春閒

頤堂詞

軟風和雨暗樓臺
餘寒巧作愁媒
半春懷抱向誰開
忍淚千回
斷夢已隨烟篆
醉魂空殢瓊盃
小窓瞥見一枝梅
疑悞君來

謝勉仲

西風庭院雨垂垂
黃花秋閨遲已涼
天氣未寒時才褪
單衣
睡起枕痕猶在
髮鬆釵壓雲低
玉奩重拂淡
脂情入雙眉

人月圓

中秋

趙元鎮

連環寶瑟深深願
結盡一生愁
人間天上佳期勝
賞今年
夜中秋
雅歌妍態嫦娥見
了應羨風流芳樽
羨酒年
年歲歲月滿高樓

王晉卿

小桃枝上春來早，初試薄羅衣。年年此夜華燈競，處人
月圓時。禁街簫鼓寒，輕夜永，纖手同携。夜闌人靜，千

門笑語聲在簾幃。

能改齊謾錄
李持正作

席間遇流落婦人

宋宗
室子

吳彥高

歸潛
志

南朝千古傷心事，猶唱後庭花。舊時王謝堂前燕子飛

向誰家

偶然相見

一作恍
然一夢

仙肌勝雪，雲鬢堆鴉，江州

司馬青衫淚濕，同是天涯。

中州樂府云：彥高北遷後為故宮人賦此時，宇文叔
通亦賦念奴嬌先成而頗近鄙俚，及見彥高此作，遂

然自失是後人有求作樂府者叔通即
批云吳郎近以樂府名天下可往求之

元遺山

玄都觀裏桃千樹花落水空流憑君莫問清涇濁渭去
馬來牛 謝公扶病羊曇揮涕一醉都休古今幾度生
存華屋零落山丘

劉因

茫茫大塊洪爐裏何物不寒灰古今多少荒烟廢壘老
樹遺臺 太山如礪黃河如帶等是塵埃不須更嘆花

金史卷之八十一
卷七
閣花開春去春來

洞天春

歐陽永叔

鶯啼綠樹聲早檻外殘紅未掃露點珍珠遍芳草正簾
幃清曉 秋千宅院悄悄又是清明過了燕蝶輕狂柳
絲撩亂春心多少

海棠春

晚春

秦少游

流鶯窻外啼聲巧睡未足把人驚覺翠被曉寒輕寶篆
沉烟裊 宿醒未解宮娥報道別院笙歌宴早試問海

棠花昨夜開多少

史達祖

梅溪詞

似紅如白含芳意錦宮外烟輕雨細燕子不知愁驚墮
黃昏淚 燭花偏在紅簾底想人怕春寒正睡夢着玉
環嬌又被東風醉

謫仙怨

劉長卿

青瑣高議

晴川落日初低惆悵孤舟解攜鳥去平蕪遠近人隨流
水東西 白雲千里萬里明月前溪後溪獨恨長江謫去

江潭春草萋萋

竇弘餘

邊塵犯闕衝關金輅提攜玉顏雲南此時消散君王何
日歸還傷心朝恨暮恨回首千山萬山獨望天邊初
月娥眉猶自彎彎

劉斧

晴山礙日橫天綠疊君王馬前鸞輅西巡蜀國龍顏東
望秦川曲江魂斷芳草妃子愁凝暮烟長笛此時吹

罷何言獨為嬋娟

武陵春

晏叔原

綠蕙紅蘭芳信歇
金蕊正風流
應為詩人多怨
秋花意與銷愁
梁王苑路香英密
長記舊嬉遊
曾看飛瓊戴滿頭
浮動舞梁州

二

九日黃花如有意
依舊滿珍叢
誰似龍山秋興
濃吹帽落西風
年年歲歲登高節
歡事旋成空
幾處佳人此

會同今在淚痕中

三

烟柳長堤知幾曲一曲一魂銷秋水無情天共遙愁送
木蘭橈薰香繡被心情懶期信轉迢迢記得來時倚
畫橋紅淚滿鮫鮎

惜別

謝勉仲

門掩東風人去後愁損燕鶯心一朶梅花淡有春粉黛
不吹勻我亦青樓成倦客風月強追尋莫把恩情做

弄成容易學行雲

信豐揖翠閣

趙介之

乍雨籠晴雲不定芳草綠纖柔燕語鶯啼小院幽春色
二分休 試凭危闌凝遠目山與水光浮袞袞閒愁逐
水流流不盡許多愁

石次仲

走去走來三百里五日以為期六日歸時已是疑應是
望歸時 鞭笞馬兒歸去也心急馬行遲不免相煩喜

鵲兒先報那人知

魏夫人

小院無人簾半捲
獨自倚欄時
寬盡春來金縷衣
憔悴有誰知
玉人近日書來少
應是怨來遲
夢裏長安早
晚歸和淚立斜暉

李易安

風住塵香花已盡
日落倦梳頭
物是人非事事休
欲語淚先流
聞說雙谿春尚好也
擬泛輕舟
只恐雙谿昨夜

艤舟載不動許多愁

岐陽郵亭

趙秋官妻

人道有情還有夢無夢豈無情
夜夜思量直到明有夢
怎教成 昨夜偶然來夢裡
鄰笛又還驚笛韻悽悽不
忍聽總是斷腸聲

一作連情女
寄陳彥臣

万俟雅言

燕子飛來花在否
微雨退掩重門正滿院梨花雪
照人獨自箇怯黃昏
輕風淡月總消魂
羅衣暗惹啼痕謾

覩着秋千腰褪裙可憐是不宜春

鏡中人

古今詞話

柳烟濃梅雨潤芳草綿綿離恨花塢風來幾陣羅袖沾
春粉獨上小樓迷遠近不見浣溪人信何處笛聲飄
隱隱吹斷相思引

高溪梅令

李端叔

好花不與殢香人浪鞦韆只恐春風歸去綠成陰玉鈿
何處尋木蘭雙槳夢中雲小橫陳謾向孤山山下覓

盈盈翠禽啼一春

雙鷓鴣

朱希真

拂破秋江烟碧一對雙飛鷓鴣應是遠來無力稍下相
偎沙磧小艇誰吹橫笛驚起不知消息悔不當時挿
得如今何處尋覓

茅山逢故人

句曲道中送友

張伯雨

山下寒林平楚山外雲帆烟渚不飲如何吾生如夢鬢
毛如許能消幾度相逢遮莫而今歸去壯士黃金昔

人黃鶴美人黃土

雙頭蓮令

信豐
雙蓮

趙介之

太平和氣兆嘉祥草木摠成雙
紅苞翠蓋出橫塘兩兩鬪芬芳
榦搖碧玉並青房仙髻擁新粧
連枝不解引鸞凰留取映鴛鴦

秋藥香

晏同叔

梅藥雪殘香瘦羅幙輕寒微透
多情只似春楊柳占斷可憐時候
蕭娘勸我盃中酒翻紅袖金烏玉兔長飛

走爭得朱顏依舊

二

向曉雪花呈瑞飛徧玉城瑤砌何人剪碎天邊桂散作
瑤田瓊藥 蕭娘斂盡雙娥翠迴香袂今朝有酒今朝
醉遮莫更長無睡

晏叔原

池苑清陰欲就還候送春時候眼中人去歡難偶誰共
一盃芳酒 朱欄碧砌皆如舊記攜手有情不管別離

久情在相逢終有

二

歌徹郎君秋草別恨遠山眉小無情莫把多情惱第一
歸來須早紅塵自古長安道故人少相思不比相逢
好此別朱顏應老

周美成

乳鴨池塘水暖風緊柳花迎面午粧粉指印腮眼曲裏
長眉翠淺聞知社日停針線探新燕寶釵落枕春夢

遠簾影參差滿院

燭影搖紅

賀方回

波影翻簾淚痕凝燭青山館離魂十里念佳期襟珮如
相款 惆悵更長夢短但衾枕餘芳騰暖半牕斜月照
人腸斷啼鳥不管

毛澤民

鬢綠飄蕭漫郎已是青雲晚古槐陰外小闌干不負看
山眼 此意悠悠無限有雲山知人醉嬾他年尋我水

邊月底一蓑烟短

眼兒媚

一名秋波媚蒲
江作小闌干

左與言

王照
新志

樓上黃昏杏花寒斜月小闌干一雙燕子兩行歸鴈盡
角聲殘綺窓人在東風裏無語對春閒也應似舊盈

盈秋水淡淡春山

與張
濃

王元澤

楊柳絲絲弄金柔烟雨織成愁海棠未雨梨花先雪一
半春休而今往事難重省歸夢遶秦樓相思只在丁

香枝上豆蔻梢頭

賀方回

蕭蕭江上荻花秋
做弄許多愁
半竿落日兩行新鴈一
葉扁舟
惜分長怕君先去
直待醉時休
今朝眼底明
朝心上後日眉頭

北地

宋徽宗

王京曾憶舊繁華
萬里帝王家
瓊樓玉殿朝喧絃管暮
列笙琶
花城人去今蕭索
春夢繞龍沙
家山何處忍

聽羌管吹徹梅花

曾純甫

離腸重勸淚相看寂寞上征鞍臨行欲話風流心事萬
緒千端春光漫漫人千里歸夢遶長安不堪向曉孤
城吹角回首關山

侯彥周

花信風高雨又收風雨互遲留無端燕子怯寒歸晚閨
損簾鉤 彈棋打馬心都懶攬掇上春愁推書就枕皂

烟淡淡蝶夢悠悠

許道真

中州

濁醪蕩得玉為漿
風韻帶橙香
持盃笑道鵝黃似酒酒
似鵝黃
世緣老矣不思量
沉醉又何妨
臨風對月山歌野調儘我踈狂

尹梅津

翰

裊裊垂楊蘸清漪
明綠染青絲
市橋繫馬旗亭沽酒無
限相思
雲梳雨洗風前舞
一好百般宜
不知為甚落

花時節都是顰眉

石孝友

次仲

愁雲淡淡雨瀟瀟暮暮復朝朝別來應是眉峰翠減腕
玉香銷小軒獨坐相思處情緒好無聊一叢萱草幾
竿修竹數葉芭蕉

蒲江

玉鈎清曉上簾衣香霧濕春枝餘寒逗雨羅裙無賴重
煖金猊柳邊誰寄東風纜流水只年時無人為說天

涯歸思梁燕空飛

史達祖

兒家七十二鴛鴦珠珮鎖瑤箱期花等月秦臺吹玉賈
袖傳香十年白玉堂前見直是剪柔腸將愁去也不
成今世終誤王昌

宋退翁

霏霏疎雨轉征鴻人語暗香中小橋斜渡西亭深院水
月朦朧人間不是藏春處玉笛曉霜空江南樹樹黃

垂密雨綠漲薰風

古今詞話

慘雲愁霧罩江天呵手捲簾看濛茸柳絮絮萬千蝴蝶飛
過危欄後庭一樹瑤華綴零亂暗香殘今番桂影也
應寒重不放新彎

萍鄉道中

范至能

酣酣日脚紫烟浮妍暖破輕裘困人天色醉人花氣午
夢扶頭春慵却似春塘水一片縠紋愁溶溶曳曳東

風無力欲皺還休

題蘇小樓

卓田

字稼軒
三山人

丈夫隻手把吳鉤能斷萬人頭因何鐵石打肝鑿膽剗
為花柔君看項籍并劉季一怒世人愁只因撞着虞
姬戚氏豪氣都休

山房
隨筆

曾舜卿

芙蓉帳冷翠衾單魂夢幾曾間怎禁未許茫茫烟水疊
疊雲山去時頻把歸期約遠不過春殘而今已是荷

花開了猶倚闌干

春情

馮偉壽

自嗔雙黛聽啼鴉
簾外翠烟斜
社前風雨已歸燕
子未入人家
鞋兒試着無人看
莫是忒寬些
想他樓上悶拈簫管
憔悴鶯花

天機餘錦

憶從溪上得相逢
樽酒兩心同
梅絨香雪竹搖寒
月柳探春風
而今總是消魂處
冷落半床空
夢迷狂蝶喜

占鵲愁望飛鴻

天機餘錦

平生幾度怨長亭不似這番深霜收水瘦風流帆飽怎
忍輕分 欄干倚遍慵歸去獨自箇黃昏荷橫釵股柳
垂裙帶總是銷魂

陳詵

鬢邊一點似飛鴉休把翠鈿遮二年三載千捫百就今
日天涯 楊花又逐東風去隨分入人家要不思量除

非酒醒休照菱花

山房隨筆云湘人陳說登第授岳陽教官與妓江柳狎時孟之經守岳聞其故一日公燕江柳不侍呼至杖之文其眉鬢間以陳說二字仍押隸辰州說悔釐其所有以贈且以此詞餞別柳將行會說故人陸雲西以荆湖制司幹官檄至岳陳先出迎以情告陸陸即取空名制幹札填陳姓名檄入制幙既而孟迎入即開宴陸曰聞籍中有江柳者善謳誰是也孟即呼至柳以花鈿隱眉間所文以前陸問其事柳出說詞陸嗟賞示孟且誚之孟求解於陸并台說同宴明日荆薦說且除柳名以畀之

漫興

薩天錫

去年人在鳳凰池銀燭夜彈絲沉火香銷梨雲夢暖深

院繡簾垂 今年冷落江南夜
心事有誰知 楊柳風柔
海棠月淡 獨自倚闌時

春情

朱淑真

遲遲風日弄輕柔
花徑暗香流 清明過了
不堪回首雲
鎖朱樓 午牕睡起鶯聲巧
何處怨春愁 綠楊影裏海
棠亭畔紅杏梢頭

朝中措

即照
江梅

歐陽永叔

平山欄檻倚晴空
山色有無中 手種堂前楊柳
別來幾

度春風 文章太守揮毫萬字一飲千鍾行樂直須年
少樽前看取哀翁

古今詞話妓獻壽時相太守改作
宰相直須作不須哀翁作仙翁

李蕭遠

郎中湖上探春迴初見照江梅過盡竹溪流水無人知
道花開 佳人何處江南夢遠殊未歸來喚取小叢教
看隔江烟雨樓臺

杜安世

養花天氣近清明
絲雨釀寒輕
滿眼春工如繡
消磨不盡離情
行行又宿小桃
舊塢芳草郵亭
喚起兩眉新恨
綠楊深處啼鶯

周紫芝

雨餘庭院冷蕭蕭
簷幕度微颺
鳥語喚回殘夢
春寒勒住花梢
無憀睡起新愁
黯黯歸路迢迢
又是夕陽時候
一爐沉水烟消

二

黃昏樓閣亂棲鴉
天末淡微霞
風裏一池楊柳月邊滿
樹梨花
陽臺路遠魚沉尺素人在天涯
想得小牕遙
夜哀絃撥斷琵琶

曾純甫

西湖南北舊游空
誰料一樽同回首
四年間事渾如飛
絮濛濛
林花謝了
明年春到依舊芳容
惟有朱顏綠
鬢暗隨流水常東

五月菊

朱新仲

香舊
續聞

玉臺金盞對炎光
全似去年香
有意莊嚴端午
不應忘却重陽
菖蒲九節金英滿
把同泛瑤觴
舊日東籬陶令
北牕正卧羲皇

石次仲

金谷遺音

亂山疊疊水泠泠
南北短長亭
客路如天杳杳
歸時能地寧寧
春光荏苒花期冷
落酒伴飄零
鬢影黃邊半白
燒痕黑處重青

二

秋夜蓮壺宮漏長
點點滴愁腸
睡起羞寬羅帶傷
心懶理嚴粧
報鵲無憑斷鴻難
倩人遠瀟湘
日日危欄倚
遍幾迴錯認歸航

陸務觀

怕歌愁舞嬾逢迎
粧晚託春醒
總是向人深處
當時枉道無情
關心近日啼紅
密訴剪綠深盟
杏館花陰恨
淺畫堂銀燭嫌明

二

瑟瑟攤鼓餞流年
燭焰動金船
綠燕難尋前夢
酥花空
點春妍
文園謝病
蘭成久旅
回首淒然
明月梅山笛
夜和風
禹廟鶯天

游王沅州山亭

管鑑

清江遶舍竹成陰
秋日共登臨
地與主人俱勝情
如酒盞方深
故園何處時
因望眼聊寄歸心
抖擻一襟涼
韻不教簿領塵侵

立夏日觀茶蘼作

一年春事到酴醾何處更花開莫趁垂楊飛絮且隨紅
藥翻塔倦遊老矣肯因名宦孤負銜盃寄語故園桃
李明年留待歸來

梅苑


山城水隘小橋傍竹裏早梅芳縱有丹青圖畫難描幽
韻清香妖嬈天賦偏宜素淡楊氏宮粧雅態何須艷
麗孤標不在春光

趙介之

踈踈簾幙映娉婷初試曉粧新玉腕雲邊緩轉修蛾還
在長安 人間千載從教鶴髮且駐朱顏看取烟霄平
步何須九轉神丹

小說

鳳凰歸去碧雲空哀草亂茸茸三國六朝一夢茫茫二
水傾東 龍蟠虎踞亭臺望裏鴛瓦重重玉女吹簫
何在斷腸淚灑西風



花草粹編卷七

欽定四庫全書

集部
花草粹編卷八

詳校官編修臣周瓊

侍讀臣孫球覆勘

總校官檢討臣何思鈞

校對官中書臣湯坦

謄錄監生臣萬朝宗

欽定四庫全書

花草粹編卷八

明 陳耀文 輯

小令

慶春時

晏叔原

倚天樓殿升平風月彩仗春移鸞絲鳳竹長生調裏迎
得翠輿歸雕鞍遊罷何處還有心期濃薰翠被深停
畫燭人約月西時

二

梅梢已有春來音信風意猶寒南樓暮雪無人共賞閑
却玉闌干 殷勤今夜涼月還似眉彎尊前為把桃根
麗曲重倚四絃看

伊州三臺 丹桂

坦菴

桂華移自雲岩更被靈砂染丹清露濕酡顏醉乘風下
臨世間 素娥襟韻蕭閒不與羣芳並看款款絳綃單
覺身輕夢回廣寒

烏夜啼

李後主

昨夜風兼雨，簾幃颯颯秋聲。燭殘漏滴頻，歌枕起坐不能平。世事漫隨流水，算來一夢浮生。醉鄉路穩宜頻到，此外不堪行。

權無染

梅

洗淨鉛華，污玉顏。自發輕紅，無言雪月，黃昏後，別是箇丰容。骨瘦難禁，消瘦香蒙不並芳穠。與君高却看花，眼紅紫，謾春風。

春思

趙德麟

樓上縈簾弱絮墻頭礙月低
年年春事關心事腸斷
欲棲鴉 舞鏡鸞
衾翠減啼珠鳳蠟紅斜
重門不鎖相

思夢隨意遶天涯

詩餘作
錦堂春

蒲江

照水飛禽鬪影舞風小徑低花
征鴻排盡相思字音信
落誰家 繫恨腰圍頓減
禁愁酒力難加樓高日暮休
簾捲芳草滿天涯

二

柳色津頭泣綠桃花渡口啼紅一春又負西湖醉離恨
雨聲中客袂迢迢西塞餘寒剪剪東風誰家拂水飛
來燕惆悵小樓空

三

漾暖紋波颭颭吹晴絲雨濛濛輕衫短帽西湖路花氣
撲春驄鬪草騫衣濕翠秋千瞥眼飛紅日長不放春
醪困立盡海棠風

四

段段寒沙淺水蕭蕭暮雨孤蓬香羅不共征衫遠砧杵
客愁中別恨慵看楊柳歸期暗數芙蓉碧梧聲到紗
窗曉昨夜幾秋風

程正伯

楊柳拖烟漠漠梨花浸月溶溶吹香院落春還盡憔悴
立東風只道芳時易見誰知密約難通芳園遶遍無
人問獨自拾殘紅

陸放翁

金鴨餘香尚暖綠窻斜日偏明蘭膏香染雲髮膩釵墜
滑無聲冷落鞦韆伴侶闌珊打馬心情繡屏驚斷瀟
湘夢花外一聲鶯

離情

劉迎

離恨遠縈楊柳夢魂長遶梨花青衫記得童臺月歸路
玉鞭斜翠鏡啼痕印袖紅墻醉墨籠紗相逢不盡平
生事春思入琵琶

閨思

前人

菱鑑玉篔秋月蕙爐銀葉朝雲宿醒人困屏山夢煙樹
小江村 翠甲未消蘭恨粉香不斷梅魂離愁分付殘
春雨花外泣黃昏

西湖

無名氏

水漫汀洲新綠雲開崦嶂微青殘紅不見成陰後鷓鴣
寂無聲 笑傲坡詩一夢風流杜牧三生西湖依舊人
中意來去竟難憑

桃源憶故人

一名虞美人影

歐陽永叔

梅梢弄粉香猶嫩
欲寄江南春信
別後寸腸縈損
說與伊爭穩
小爐獨守空灰
燼忍淚低頭
畫盡眉上萬重
新恨
竟日無人問

二

鶯愁燕苦春歸去
寂寂花飄紅雨
碧草綠楊岐路
况是長亭暮
少年行客情難訴
泣對東風無語
目斷兩三煙樹
翠隔江淹浦

冬景

秦少游

玉樓深鎖薄情種
清夜悠悠誰共羞
見枕衾鴛鴦悶
則和衣擁
無端畫角嚴城動
驚破一番新夢
窻外月華霜重聽徹梅花弄

詩餘

碧紗影弄東風曉
一夜海棠開了
枝上數聲啼鳥
粧點知多少
妬雲恨雨腰肢
裊眉黛不堪重掃
薄倖不來春老羞帶宜男草

黃山谷

碧天露洗春容淨
淡月曉收殘暈
花上密煙飄盡
花底鶯聲嫩
雲歸楚峽厭厭
困雨點遙山
新恨和淚暗彈
紅粉生怕人來問

鄭中卿

東風料峭寒吹面
低下綉簾休卷
憔悴怕他春見
一任鶯花怨
新愁不受詩排遣
塵滿玉毫金硯
若問此愁深淺
天闊浮雲遠

王逸民

劉郎自是桃花主，不許春風門度。春色易隨風去，片片傷春暮。反魂不用清香注，却有梅花淡佇。從此鎮長相，雁不怨飄殘雨。

桃源憶故人

吳子和

畫橋流水飛花舞，樓外斜風細雨。紅瘦綠肥春暮，腸斷桃源路。懽隨仙子乘鸞去，鏤月裁雲何處。唯有病和愁緒，肯伴劉郎住。

趙元鎮

青春不與花為主
花正開時春暮
花下醉眠休訴
看取春歸去
鶯愁蝶怨
春知否
欲問春歸何處
只有一尊芳醕
留得青春住

朱希真

雨斜風橫香成陣
春去空留春恨
歡少愁多
因甚燕子渾難問
碧尖感損眉慵
暈淚濕胭脂紅
沁可惜海棠吹盡
又是黃昏近

二

西樓幾日無人到，依舊紅圍綠遶樓。
落花誰掃不見，長安道。碧雲望斷無音耗。
倚遍闌干殘照。試問淚彈多少，濕遍樓前草。

城頭月

贈梁彌仙

馬天驥

城頭月色明如晝，總是青霞有酒醉。
茶醒饑餐困睡不，把雙眉皺。
坎離龍虎勤交媾，煉得丹將就。
借問羅浮鶴侶，還似先生否。

和

李昂英

工夫作用中宵晝點化無中有真意長存童顏不改底
用呵摩皺一身二五陽精媾積得嬰兒就借問霞仙
三田熟未還解飛冲否

柳梢青

人佳

周美成

有箇人人海棠標韻飛燕輕盈酒暈潮紅羞蛾凝綠一
笑生春為伊無限傷心更說甚巫山楚雲斗帳香消
紗窗月冷着意溫存

春暮

賀方回

子規啼血可憐又是春歸時節滿院東風海棠鋪繡梨
花飛雪 丁香露泣殘枝諳未比愁腸寸結自是休文
多情多感不干風月

秦少游

岸草平沙吳王故苑柳裊烟斜雨後寒輕風前香輦春
在梨花 行人一棹天涯酒醒處殘陽亂鴉門外鞦韆
墻頭紅杏深院誰家

游女

蔣勝欲

學唱新腔鞦韆架上釵股敲雙柳
雨花風翠鬆裙褶紅
膩鞋幫
歸來門掩銀缸淡月裏
踈鐘漸撞嬌欲人扶
醉嫌人問斜倚樓窻

有談舊倡潘氏

前人

小飲微吟殘燈斷雨靜戶幽窻幾度
花開幾番花謝又
到昏黃
潘娘不是潘郎料應也
霜粘鬢傍鸚鵡闌空
鴛鴦壺破烟渺雲茫

七夕

劉叔安

乾鵲收聲濕螢度影庭院秋香步月移陰梳雲約翠人
在迴廊 醺醺宿酒殘粧待付與溫柔醉鄉卻扇藏嬌
牽衣索笑今夜差涼

二

醺醺過也醺醺過後無花堪折只有垂楊垂楊却作絮
驚行色 海棠半在如無又爭倩薔薇戀得除是東風
隨君歸問玉堂消息

謝無逸

香肩輕拍樽前忍聽一聲將息昨夜濃歡今宵別酒明日行客
後回來則須來便去也如何去得無限離情
無窮江水無邊山色

朱希真

紅分翠別宿酒半醒征鞍將發樓外殘鐘帳前殘燭窻
邊殘月想伊綉枕無眠記行客如今去也心下難拚
眼前難覓口頭難說

二

任蹤怪迹誰料半老天涯為客帆展霜風船隨江月山
寒波碧 如今着處添愁怎忍看參西鴈北洛浦鶯花
伊川雲水如何歸得

舉場不利

董參政

夷堅志

滿腹文章滿頭霜雪滿面埃塵直至如今別無收拾只
有清貧 功名已是因循懊恨張巡李巡幾箇明年幾
番好運只是瞞人

德壽宮觀花應制

張掄

柳色初濃餘寒似水纖雨如塵一陣東風殺紋微皺碧
沼鱗鱗 仙娥花月精神奏鳳莞鸞絃鬪新萬歲聲中
九霞盃內長醉芳春

和前

曾覲

桃靨紅勻梨腮粉薄鴛徑無塵鳳閣凌虛龍池澄碧芳
意鱗鱗 清時酒聖花神看內苑風光又新一部仙韶
九重鸞仗天上長春

二

小宴清秋霎時見了雨散雲收柳絮輕柔梅花閒澹宮
院風流空教夢遶青樓待說箇相思又休無奈情何
不來眼底常在心頭

張元幹

海山浮碧細風絲雨新愁如織慵試春衫不禁宿酒天
涯寒食歸期莫數芳辰誤幾度回廊夜色入戶飛花
隔簾雙燕有誰知得

送梅坡

劉改之

泛菊盃深吹梅角遠同在京城聚散匆匆雲邊孤鴈水
上浮萍 教人怎不傷情屈指知心幾人後夜相思塵
隨馬足自逐舟行

豐樂樓

趙汝愚

水月光中烟霞影裏湧出樓臺空外笙簫人間笑語人
在蓬萊 天香暗逐風回正十里荷花盛開買箇小舟
山南遊遍山北歸來

七夕諸公祖席

管鑑

澹雲微月又是一年新秋佳節天上懽期人間何事
成離別 清尊欲醉還歇怕飲散匆匆話別若是經年
得回相見甘心愁絕

盧炳

蘭蕙心情海棠韻度楊柳腰肢步穩金蓮手纖春筍膚
似凝脂 歌聲舞態都宜拚着箇堅心共伊無奈相思
帶圍寬盡說與教知

元正

吳雲堅

綵杖鞭春鵝毛飛管斗柄回寅拂面東風雖然料峭畢
竟寒輕 戴花折柳心情怎捱得元宵放燈不是今朝
有此殘雪先去踏青

張鎡

天遠山圍龍蟠澹靄虎踞斜暉幾度功名幾番成敗渾
似鷗飛 樓臺一望淒迷笑到底空爭是非今夜潮生
明朝風順且送船歸

岳陽樓

戴式之

袖劍飛吟洞庭青草秋水深深萬頃波光岳陽樓上一
快披襟 不須携酒登臨問有酒何人共斟變盡人間
君山一點自古如今

梅

朱淑真

玉骨冰肌為誰偏好特地相宜一味風流廣平休賦和
靖無詩 倚窻睡起春遲困無力菱花笑窺嚼蕊吹香
眉心點處鬢畔插時

二

茅舍踈籬半飄殘雪斜臥枝低可便相宜烟藏脩竹月
在寒溪 亭亭佇立多時拚瘦損無妨為伊誰賦才情
畫成幽思寫入新詩

三

月墜霜飛隔窓踈影徹見橫枝不道寒香解隨羌管吹
到屏幃 箇中風味誰知睡乍起烏雲任歆嚼葢搖英
淺顰輕笑酒半醒時

欽定四庫全書

花草粹編
卷八

十四

蜀州王守門下客遇紅梅花作崇贈此

依稀曉星明滅白露點蒼苔敗葉斷址頽垣荒烟衰草
漢家宮闕咸陽道上行客又依舊利名深切改換容

顏銷磨今古隴頭殘月

古今詞話

胡搗練

晏幾道

小春花信雪中來隴上小梅先拆今歲東君消息還自
南枝得素衣洗盡九天香玉酒添成國色一自故園
踈隔腸斷長相憶

二

夜來江上見寒梅，自逞芳妍標格為甚。東風先折分付春消息。美人釵上玉樽前，朶朶穠香堪惜。誰把彩毫描得免，恁輕拋擲。

雪上送唐彥猷

張子野

使君少醉離亭酒，酒醒離愁轉有。紫禁時虛，右清霄留難久。一聲歌掩雙羅袖。日落汀花春後，猶有東城烟柳。青蔭長依舊。

欽定四庫全書

花草粹編
卷八

十五

鹽角兒

晁無咎

初開似雪勝開似雪花中奇艷香非在蕊香非在萼骨
中香徹 占溪風留溪月堪羞損山桃如血直饒更踈
淡終有一般清別

撼庭秋

晏同叔

別來音信千里恨此情難寄碧紗秋月梧桐夜雨幾回
無寐 樓高目斷天遥雲黯只堪憔悴念蘭堂紅燭心
長燭短向人垂淚

賀聖朝

葉道卿

滿斟綠醕留君住莫匆匆歸去三分春色二分愁悶一分風雨
花開花謝都來幾日且高歌休訴知他來歲
牡丹時候相逢何處

趙德莊

河陽桃李開無數待乘春歸去小園幾片忽驚飛恨主人難駐
雛鶯乳燕悲語道留君不住願君送處作
東風與羣芳為主

馮延巳

金絲帳煖牙床穩
懷香方寸輕顰輕笑
汗珠微透柳沾
花潤 雲鬢斜墜
春應未已不勝嬌困
半歌犀枕亂纏
珠被轉羞人問

趙鼎

斷霞收盡黃昏雨
滴梧桐疎樹
簾櫳不捲夜沉沉
鎖一庭風露
天涯人遠
深期夢悄
苦長宵難度
知他窓外
促織兒有許多言語

喜團圓

晏叔原

危樓靜鎖窓中遠岫門外垂楊珠簾不禁春風度解偷
送餘香 眠思夢想不如雙燕得到蘭房別來只是憑
高淚眼感舊離腸

與團圓

絞綃霧縠沒多重數緊凝偷憐孜孜覩着笑前生只結
得眼因緣 眼是心媒心為情本裡外勾連天還有意
不遠人願與箇團圓

二

輕攢碎玉玲瓏竹外脫去繁華殢東君先點破壓羣花
瘦影生香黃昏月館清淺溪沙仙標淡竚偏宜么鳳
肯帶棲鴉

洛陽春

歐陽永叔

紅紗未曉黃鸝語蕙爐銷蘭炷錦屏羅幕護春寒昨夜
三更雨 綉簾閒倚吹輕絮斂眉山無緒看花拭淚向
歸鴻問來處逢郎否

極相思

宋宗室夫人

柳烟霽色方融花露遍金莖鞦韆院落海棠漸老才過
清明嫩玉腕托香脂臉相傳粉更與誰情秋波綻處
相思淚迸天沮深誠

墨客
揮犀

二

拂墻花影飄紅微月辨簾櫳香風滿袖金蓮印步狹徑
迎逢笑靨乍開還斂翠正花時却恁西東別房初睡
斜門未鎖且更從容

陸務觀

江頭疎雨輕煙寒食落花天翻紅墜素殘霞暗錦一段
淒然 惆悵東君堪恨處也不念冷落樽前那堪更看
漫空相趁柳絮榆錢

憶漢月

歐陽永叔

紅艷幾枝輕裊新被東風開了倚烟啼露為誰嬌故惹蝶
憐蜂惱 多情遊賞處留戀向綠叢千繞酒闌歡罷不
成歸腸斷月斜春老

醉鄉春

詞勝州作

秦少游

冷齋夜話

喚起一聲人悄衾冷夢寒霜曉瘴雨過海棠開春色又
添多少 社甕釀成微笑半破癭瓢共島天覺顛倒急
投床醉鄉廣大人間小

少游在黃州飲於海棠橋橋南北多海棠有老書家
海棠叢開少游醉臥於此明日題此於柱

河瀆神

溫庭筠

河上望叢祠廟前春雨來時楚山無限鳥飛遲蘭棹空
傷別離 何處杜鵑啼不歇艷紅開盡如血蟬鬢美人

愁絕百花芳草佳節

花草粹編卷八